

書名 空同先生集六十三卷 嘉靖九年序刊本
 撰者 明 李夢陽 撰
 卷 卷十八
 內容分類 集-別集-明中葉
 索書號 倉石:40084
 編號 4008000

卷十八

空同先生集卷第一

賦一十首

北郡李夢陽撰

疑賦

鈍賦

思賦

述征賦

省愆賦

宣歸賦

緒寓賦

寄兒賦

俟軒子賦

竹石賦

一十首

疑賦

乾坤高卑易矣。星辰在下。江河逆矣。天喬喬天。

[彩色首頁1](#)

[東洋文化研究所漢籍目錄 編號: 4008000](#)

[東洋文化研究所漢籍目錄所藏漢籍善本全文影像資料庫 索書號: 倉石:40084](#)

[漢籍善本全文影像資料庫文本空同先生集六十三卷 嘉靖九年序刊本](#)

版權所有: [東京大學](#) [東洋文化研究所](#)

[使用上的注意事項](#)



放蛇引

花蛇錯落五色備毀垣掘出蛇驚悸昂頭宛頸若有
訐盤旋瞥捩如奔避深山大澤豈無窟荒郊短草真
何意豸虎公然白晝行花蛇何得更縱橫祇知毒口
能戕物未解皇天實好生洪流自古容微細吾叱園
丁縱蛇逝風驅雷霆急雨過彩虹倒掛青天霽

空同先生集卷第十七

空同先生集卷第十八

北郡李夢陽撰

詩 七言歌行四十首

贈答

送何舍人齋詔南紀諸鎮

上元訪杜鍊師

奉送大司馬劉公歸東山草堂歌

二月四日部署宴餞徐顧二子

七峰歌壽范郎中淵 送人還關中

寄兵備高僉事江 寄內弟玉

雪東鄭生 吁嗟行示周生

送鄭器

寄鮑宇

三鶴歌為丘三公壽亦載厥實事焉

君不見贈鄭莊

嗚呼行寄康子以其越貨之警

送席副使監貴州屯學二事歌

送鮑激還歙

送鮑相如金陵

君不見贈馬僉事應祥

得馮御史允中書

秋夜徐編脩宅宴別醉歌

發京別錢邊二子 東園翁歌

苦熱東屠叅議 白鹿洞別諸生

豫章遇鍾子送贈 董公衙賞緋桃行

得家書寄兄歌 寄鄭生歌

余鄒二子遊白鹿書院歌

戲贈周紀善 龍沙行別袁生

潯陽寄毛君湖口

鄭生山遊歸予作此歌

丈人行 鶴癯子歌

寄殷給事中歌 送田生赴京歌

送陳冠歌 芝梓行

贈荅

送何舍人齋詔南紀諸鎮

先皇乘龍去不返悲風慘淡吹宸極四海哭若喪慈
母百官狂走天為黑憶昨臨危坐御床手挈神器歸
今皇容語丁寧肺腑裂三老親聞眼流血金滕立剖
石室秘此事難從外人說我君謙讓不可得割哀踐
昨弘祖烈日月重懸萬國朝雷雨赦過羣方悅越南
海北霹靂動蠻夷盡奉王正月此時九道使臣出舍
人亦輟螭頭筆白馬朝騰薊北雲錦帆暮閃江沱日
江沱秋交多裂風洞庭雲夢俱眼空巴陵縣令舍人
兄接詔會弟西樓中童年題詩在高壁六載不到紉
為籠南嶽以南惟峻山苦蒸毒霧何盤盤天王新令
雷電掣妖蛇不敢啼林端五溪官長喘喙拜黔州父
老垂淚看却瞻蒼梧雲氣黑斑竹臨江怨幽色翠華
縹緲空冥間此時此恨誰知得君不見馬援柱孔明
碑剝落黃蒿裏千年莓苔待君洗萬里之行自此始
歸來何以獻天子

上元訪杜鍊師

宣皇昔時乘八風御龍遊戲行煙空馬前兩兩侍玉
女別館多在蓬萊宮朝天宮中舊時殿樓臺畫鎖無
人見琉璃井塌青苔滿松栢森森月如練嗚呼往事
難具陳燈火如山又一春北斗壇西訪隱淪我師黃
衫白氈巾坐我更致西樓賓玉杯瀲灩赤瑪瑙織罽
四角銀麒麟酒肉山堆滿堂醉仙厨往往來八珍孝

宗之朝五真人師也磊落當其倫自言召見親賜食
曾托丹書獻紫宸如今寂寞看春色銀魚玉帶無消
息豈惟魚帶無消息欲語吞聲淚沾臆勸師對此莫
酸辛世間萬事如轉輪且將芝草供生計聊與煙霞
作主人月偏彩雲當牖生旋呼兩童吹玉笙聞師妙
得逡巡術百壺倒盡還須傾古來仙子向誰在飲者
翻垂千載名名垂千載亦區區酒闌燈昏夜復徂不
見秦陵草已宿春生樹啼雙老烏此時亦應群帝趨
金燈翠旗光有無

奉送大司馬劉公歸東山草堂歌

東山有草堂縹緲雲嶠孤前對祝融峰下瞰巴陵湖

明公昔時此堂居麋鹿熊豕當窓趨洞庭日落風浪
湧倒影射堂堂欲動慘淡誰聞紫芝曲獨善不救蒼
生哭先帝親裁五色詔老臣曾受三朝祿此時邊徼
多戰聲曳履謁帝登承明謝安笑却淮淝敵魏相坐
測單于兵九重移榻數召見夾城日高未下殿英謀
密語人不知左右微聞至尊羨自從龍去不可攀公
亦卧病思東山湘娥含笑倚竹立山鬼窈窕堂之側
上書苦死只欲歸聖旨優容意悽惻內府盤螭縷金
織賜出傾朝皆動色白金之鈿紅票記寶鈔生硬雅
翎黑崇文城門水雲白是日觀者塗路塞城中冠蓋
盡追送塵埃不見長安陌人生富貴豈有極男兒要

在能死國不爾抽身早亦得君不見漢二疏千載想
慕傳畫圖即如草堂何處無祿食醜竊胡為乎乃知
我公真丈夫嗚呼乃知我公真丈夫

二月四日部署宴餞徐顧二子

春日載陽官署幽東吳二子過我游庭空日斜吏人
散窅然何異經林丘今晨驚蟄暖氣達昨夜哀鴻呼
故儔中庭古槐蒼蘚溽上有百鳥何啁啾倉庚交交
刷其羽君看巨細各有求明時冠軒幾邂逅得暇胡
不攀淹留自從去年識徐顧令我意氣傾南州徐郎
近買洞庭棹顧子亦具錢唐舟浮生飄轉若飛蓬倏
忽聚散誰能謀風光爛熳况復爾願寫清壺銷客憂
故人苦稱不好飲舉杯入唇還復休妙歌時時激慷
慨鄙夫何以答綢繆嚴柝沉沉靜夜色北斗倒掛城
南樓祗恐天明驅馬出攬袂延望河之洲

七峰歌壽范郎中淵

我聞桂陽江上峰平地突出七芙蓉三峰峯崿如列
戟四峰裊裊翔飛龍孤水東來走其下上巖下巖惟
古松有時雲霧滿四壑洞中仙侶時相逢使君磊落
中行後家傍前峰對江口暗想精靈盤礴初嶽降生
申理或有平生氣與蒼壁高落筆煙霞常在手六載
為郎不愛身五十生兒將白首湘南新鮮紅勝玉燕
京高會多名酒歲歲登堂娛笑歌我七峰為爾壽

送人還關中

得萬字

君不見劉毅貧時一擲常百萬君不見唐時鄭虔道
高坎墮腹無飯英雄際會各有時人生豈必皆如願
關中老翁燕薊客昔何慷慨今何怨王通無媒畚
關楊雄有賦何由獻君歸射獵南山麓得錢且學樊
侯販

寄兵備高僉事江

三月無雨乾殺麥六月雨多禾耳黑長江浪高蛟龍
鬪淘河瀉漚啼清晝此時憐君備兵越天陰不見日
與月白衫盥徒慣風濤我軍慎勿貪倉猝

寄內第五

自汝林居將一月我心不寧長惛惛郊寒歲暮風色
苦曠野無鄰天雨雪亟欲載酒往問子米路難行畏
蹌跌豈無輕裘與快馬王也視之如敝屣此道於今
識者稀勸弟寬懷慎藥物

雪柬鄭生

夜來雪花如掌大無事閉門但眠卧僵牛死馬非所
慮天翻地裂疇能那近時好事最者誰徽州鄭生差
愛我甕頭春酒不餘瀝天明梳洗午尚坐北風其涼
二儀閉雪吹飛沙映天過老夫畏寒况無力生也乃
是雄豪佐梁園之陌平若掌放兔呼鷹無不可不然
騎驢學爾祖乘興一鼓山陰柁

吁嗟行示周生

吁嗟周生千萬駒今行不得如蟾蜍雖有寶劍寒吹
毛一日不遇成鈿刀子不見豐城紫氣干雲霄鹽車
之下多悲號張華伯樂行相遭

送鄭器

梁園仲冬雪積阻慘慘風亂平沙樹泥深馬瘦不得
行縹緲金陵在何處青絲絡酒提玉瓶強出送子城
東亭旦望淮河暮江水雲飛鴻鴈天冥冥

寄鮑宇

愧我夷門草堂寂種菊蕪穢生蓬蒿爾家華堂近江
浙開花爛熳秋雲高去年此日同爲客今年對菊遙

相憶黃山練水在何處獨倚南牕望南國

三鶴歌爲丘三公壽亦載厥實事焉

老鶴東來度海水與雌俱飛引其子回翔萬里始一
息丘家麥田澤泚泚逍遙洗濯飲食足炯如煙雪無
泥滓此鳥千年丹始成口銜赤玉蒼龍精落地化作
金光草采食還丹毛骨輕古來拔宅將妻子肯使丘
翁地上行

君不見贈鄭莊

君不見江上鴈嗷嗷喚儔侶勁羽輕毛常趁風往來
漂泊如羈旅男兒落地既有身誰能齷齪猶婦人懷
中有劍亦不貧吳下阿蒙君莫嗔

鳴呼行寄康子以其越貨之警

鳴呼皇天不可測一冬無雪春無雨黃霾翻風白日
動前飛秃鷲後飛鵠堂堂古路長蒺藜萬家之城走
豺虎百姓誅求杼柚空兒號女啼守環堵饑寒盡化
為盜賊可惜良民作囚虜腰弓帶箭百成群少年馳
馬仰射雲蒼山日落行旅稀醉唱胡歌各自歸山東
趙實已授首南陽回賊同猪狗諸君但欲樹功業玉
石俱焚理或有近者內丘大寧河橫賊八騎持干戈
裕州知州與賊戰康也扶柩衝之過資糧蕩盡僅身
免月暗天昏路途遠古人作善番軾軻痛哭寒城白
雲返頃聞留滯在襄國百口仰給縣官食吾兄匹馬

走問之半月更復無消息夜立中庭北極高晝看河
朔風沙黑汝寧以南土尤赤空城二月生荆棘斗米
可以換嬌女牛馬餓死枯蒿側比來官吏守空印拖
男抱女盡向北即防此輩更充斥恐汝後歸歸不得

送席副使監貴州屯學二事歌

席名書字文同蜀人

我昔在北京送君向河南豈料在河南送君如百蠻
瘴雲蒼蒼途路艱泮河羅施皆峻山法官要自褰帷
入倏忽開明衆山出大抵夷狄似禽鳥制之雖勤忌
拘急此曹亦是人心性頃來漸慕衣冠習文翁化蜀
豈無本李牧屯田務招輯所恨故人限萬里令我蚤
夜心於邑丈夫已際飛龍會野人猶抱枯魚泣感新

舊懷心肺酸萬事回頭百憂集弘治之間時世異與
君次第陳封事許身謬比漢賈生推君每稱唐陸贄
朝回對坐香爐省出門並結青雲轡自從分手哭遺
弓縉紳漂泊余亦同抱甕梁王修竹園遺址宋帝蓬
萊宮生涯放逐似羈旅混迹迂腐隨村翁曾聞伏櫪
有老馬豈即道路傷秋蓬天下瘡痍况未息西南貢
篚防難通杜鵑向識君臣禮蛟龍終收雲雨功相如
諭蜀文章壯馬援平交德業雄扶危濟弱付公等臨
岐悵望天南鴻

送鮑激還歛

昔時賢達或未遇途路坎坷常固窮鹽車騏驥亦拋

棄人生豈得無西東君年五十猶未通江湖去住隨
飛鴻黃山紫陽日索寞題詩蚤向軒轅宮

送鮑相如金陵

去冬君行雪積阻相送城東念羈旅今冬相逢不逾
月再別令我情更苦金陵市頭酒如蜜此去酣歌與
誰侶我在梁園獨岑寂莫教碧草生春渚

君不見贈馬僉事應祥

君不見庭中樹今冬憔悴春作花君不見桑上草含
陽籍土抽紫葩富貴詎有種貧賤豈無涯君今身為
指南車何不留之殿京華北游漢水南長沙君雖在
漢水與長沙高不愁虎卑無蛇

得馮御史允中書

鳳凰不識梧桐樹一落蓬蒿鳥雀欺滄洲鴻鵠長毛
羽縱有雲羅柰爾爲昨日柳陽馮侍御臨流寄我錦
雙魚黃河峻嶒雪十丈過臘逢春始得書開緘不見
下江舸梅花滿枝空淚予

秋夜徐編修宅宴別醉歌

徐郎三杯拂劍且莫舞聽我擊節歌今古曲長調悲
不易竟天地熒熒月東吐燕山八月風力怒落葉交
加映尊俎愴時感事百憂集死別生離同一苦身逢
累朝全盛日弘治之間我親覩朝廷無事尚恭默天
下書計歸臺府五陵鞍馬速雷電千官氣勢如風雨

却憶年年秋月時日與爾輩同襟期如澠之酒差快
意袒跣呼號百不思絃張柱促衣冠禍綜覆崩奔學
士疲倉皇世事難開口物極則還理宜有羸疾已分
沙田草遭逢復折都門柳富貴在天得有命人生反
覆如番手不見去年臨別處吞聲躑躅鴛求友邂逅
寒暄不自知隔絕榮華爲誰守歌殘酒乾天欲曙門
外驅駒已西首哀鳴胡鴈亦南飛露濕群星朝北斗
發京別錢邊二子

秋風浙浙吹燕山游子杖劍出燕關車脂馬飽夜將
發錢邊二子來相攀此時群星覲上帝驂鸞翳鳳雲
之際君不見牽牛與織女一水盈盈獨流涕

東園翁歌

東園翁今六十餘面常泥垢髮不梳身藏寶劍人不識反閉衡門讀古書此翁十五二十時歎唾落地迸成珠陸機不敢以伯仲管輅警敏空嗟吁生鱗即與蛟龍伍未汗寧同凡馬趨爾時射策黃金闕三百人中最英發驂騮舉足狹萬里便欲登天攬日月豈知德尊常軼軻獨買扁舟泛吳越三十年來萬事變富貴於我真毫髮歸來灌園種瓊花荷鋤自理東門瓜夜眠海月掛丹牖晝看江風滾白沙遼東合有逢萌宅齊西再覩陶朱家北郡李生三十六擯斥高歌卧空谷前輩後輩道豈殊同坐同行限江麓東望東園

亂心曲安得逐爾騎鴻鵠

苦熱東屠叅議

豫章之熱真毒淫六月已破仍不禁赤雲行空日在地萬里一望炎煙深東蒸扶桑榦欲槁黑河水乾龍不吟院松亭亭我所愛比遭摧炙無好陰縱令跣足欲何往此地寸冰如寸金層簷大厦尚喘喙矮屋茅堂淚滿襟滕王有閣高百尋閣下澄江清映心紫微使者卧其上卷幔恰對西山岑赤脚門子搖大扇行坐吟哦揮素琴幾欲往訪簿書枯豈我無酒同誰斟亭午蘊隆潭水沸蛟蜃下徙鼉鼉沉何況走原獸棲枝禽嗚呼豫章之熱其苦有如此而我胡爲營營與

世爭華簪

白鹿洞別諸生

東南自有匡廬山遂與天地增藩衛山根插入彭蠡湖崢嶸背殺三江勢地因人勝古有語於千萬物隨興廢學館林宮客不棲千巖萬壑堪流涕文采昔賢今尚存講堂寂寞對松門松門桂華秋月圓拄杖高尋萬古源梅嶺古色照石鏡扶桑丹霞迎我軒絕頂坐歌霜月淨石潭洗足芝草繁更有冠者五六人峭崖窮嶂同攀蹇草行有時聞過虎旦暮時復啼清猿我今胡爲公務牽蟋蟀在戶難久延出山車馬走相送落日遂上鄱陽船生徒戀集涯潯孤帆月照仍

留連情深過厚亦其禮謏薄竊愧勞諸賢明朝伐鼓凌浩蕩五峰雙劔生秋煙

豫章遇鍾子送贈

豫章八月江勢輕水關行馬沙觜平聞君纜舟挽君住向夕惡風銀浪生頃時收帆萬船集波顛石倒蛟龍立中流躒子獨何意欵々猶搖雙槳入天清未風君已迴帆色迢迢萬里來拂衣漢口鳧鴈亂擊榜南浦芙蓉開漢口逢君又南浦人生聚散風中雨黃石公赤松子在何所君今抽簪我簪組

董公衙賞緋桃行

吁嗟董公垂老官不遷途雖坎坷志不變三歲提兵

而列銜此事堪傷亦堪羨二月南風捲章水黃昏西
省開芳宴刑司軍司皆集衙盆中緋桃俄放花董公
捋鬚向客誇客起環視咸咨嗟情酣展轉移燈照酒
氣撲花花欲笑逢人合與世酩酊衰顏苦被春勾調
君不見玄都觀裏樹不與武陵源上殊時來開落各
異地董公董公今宵與客且倒花前壺

得家書寄兄歌

三年路遙消息阻緘書實凍兄心苦鴻鴈無愁奮翅
難鵲鴿且暫遊寒渚時望東湖西日微雪冬廬獄北
思歸獨虞四海干戈滿生別悲傷見面稀

寄鄭生歌

商康烈風無時休將歸船滯增煩憂空城雪埋狐兔
走十日凍合鼉河洲廬山咫尺不得往汝在梁園獨
予想開緘嘆恨東遊阻琅玕天姥春空長

余鄒二子遊白鹿書院歌

洞原路冰山徑微二子日遊過夜歸巖宮古刻徧覽
讀馬時蹒跚泥在衣頃來烈風號季冬雪霾不見五
老峰苦心數子守寂寞我病講堂虛鼓鐘二子此行
真特奇異時獨往今可知虎吟狐啼且不懼肯使楊
朱泣路岐

戲贈周紀善

廣文先生何為者十欲出門九借馬只今徒步裹水

濱衰鬢漠漠常風塵鳳凰在斂鷄啄食首宿闌干半
青黑君不見楚筵醴罷暮歸來甌塵妻子無顏色

龍沙行別袁生

君不見玉虛觀前松去年凍乾今復生樹靈力排雷
雨會幹大每與蛟龍爭下有萬古不定之龍沙風滾
無時休英雄奮發各有時運至賈販皆公侯腐草尚
爲螢何況堂堂七尺軀萬物之靈高牙大纛苟不我
石泉白雲誰復爭舉眼江漢鴻冥冥與爾倒此沙頭
瓶

潯陽寄毛君湖口

大江六月涼風發匡廬清波涼明月削出萬朵青芙
蓉水底搖動金銀闕美人盈盈坐湖縣昏叩石鐘磬
晞髮悵望迢迢碧雲合早晚扁舟向蠻越

鄭生山游歸予作此歌

歧予望之六六峰欲往爭柰今嚴冬石林崎嶇積雪
盛日中無煙虎豺病生也孤往胡所希凍攀幽嶮探
其微手皴面黑逾旬歸太室少室何者竒曾否首陽
歌采薇北邙透迤清洛遠天白冰崇伊闕晚灞上騎
驢爾靡辱袁安高卧吾應醜忽然想生經行宋家陵
往來寂寞東西京翹首淚下嵩山青

丈人行

丈人九十牙齒存行曳竹杖挈玄孫只知灌園同漢

陰何須采藥游鹿門山房春歸碧草萋蕙帳月白露
滿蹊少微星沈湖水湧松林夜夜猿嘯啼

鶴癯子歌

鶴癯子汝人也而何爲乎鶴形美髯修修雙瞳青閉
肆夜讀黃庭經晨出荷鏡掘茯苓鶴癯子汝豈無萬
里骨刀劒翮路遙朋寡日云暮弱水逢瀛壯心隔君
不見江中老龍亦高卧鶴乎鶴乎誰汝那

寄殷給事中歌

斑鳩賦形百鳥內化爲蒼鷹百鳥避秋空萬里試一
擊灑毛紛紛稱鷹意迴旋簸蕩風沙開海寧光清鸞
鳳來天地炯炯元精回此以贈君君毋猜金陵雖隔

黃金臺汝翊紫蓋臨三台飛章御覽不十日道路間
靜豺狼哀憶昔匹馬長安走殷何徐陸皆吾友楚姬
娉婷華色並殷生稜眉獨方口何郎短小亦不醜此
離今各經年久夢寐猶存上苑花飄零寂寞西湖柳
丈夫致身貴不朽陟要階華亦何有賈誼才名信早
知姚崇相位非難取大江滾滾東北趨群龍霜蟄鼉
叫呼汝登鳳臺念老夫爲我致一鳳之雛我不敢玩
亦不敢狎誠心餽飼毛羽全使聽簫韶翔舜都

送田生赴京歌

正月八日天驟黃大風晝晦沙飛揚河水慄烈人不
行駕鵝鵠鴈交踉蹌黃鵠呼曹厲毛翼一舉橫天向

天北君不見左生北上田生俱長安走馬花九衢

送陳冠歌

虎子墮地氣已麤驕驕汗血自爲駒陳生垂髫骨即
殊雙瞳炯炯唾成珠前年汝與計吏俱承明謁帝未
生鬚丈夫志欲日月並雲雨且使蛟龍湏冬風獵獵
吹楚湖憐汝送母催楚艫調羹臘盡江門水戲彩春
停汴上都憶昔乘驄按南國汝在諸生獨英特三秋
自阻北飛鴈萬里今逢舊顏色私計彭宣晚必親敢
言裴儉前能識寒温始知君子厚杖屨蕃增世人惑
匏子柳煙風日和力疾送子臨黃河汝親日望泥金
使老夫擬作瓊林歌


芝泮行

崑崙子之來也李子觴焉及夜瓶芝自墮以爲
泮行觴焉平可檠二觴行之穩持之輕客大駭
笑歡盡醉而李子賦詩

霜嚴夜清月在南燈明酒温客氣酣銅瓶玉芝鏗墮
地客將傳玩誇神異仰芝把蒂行金杯蒼文古紫當
筵開已驚歛灑菡萏動更詫屈錯蛟龍迴憶芝初出
盤精氣雲流石立颺颺避赤箭琅玕色盡枯神訶鬼
守求非易泄秘真遭天地怒懷珍顧使時人忌自從
獲芝升我堂琴書几席俱輝光晴日徐看瑞氣合炎
天每挹仙雲涼燕山豪士來何方悲歌起舞宵未央

芝乎自銜亦太異頓令四座深杯觴
鴈行逶迤月轉白月色芝光巧相射
醅醕觸擊瑪瑙碎淋漓迸落直珠赤
君不見玉屈卮金叵羅珠花繡草柱
自艷停杯聽我芝枰歌

空同先生集卷第十八





所
圖
書

